

■ PCD E PBD

Co-presidi tar l'Allianza enfin dal 2024?

(cdm/fmr) Suentar ch'ils commembers da la PCD e da la PBD han dà – en ina retschertga consultativa – il consentiment per ina fusiun, suondan ussa ils proxims pass en vista ad ina votaziun ils 7 da zercladur 2021. Ina fusiun definitiva da las duas partidas a l'Allianza dal Center Grischun entrass lura en vigur per immediat.

Sco las duas partidas han infurmà dumengia saira en ina comunicaziun a las medias, han ellas ussa dà en consultaziun tar lur commembras e commembers tant il contract da fusiun sco era las novas statutas. La consultaziun cuzzo mo paucs dis, enfin ils 6 da matg 2021. Las statutas sa basan sin quellas da la PCD, las qualas èn vegnidas surlavuradas cumpletamain.

Il contract da fusiun che las duas partidas han elavurà, regla tranter auter era co ils uffizis e gremis principals vegnan occupads durant in'emprima fasa. Uschia duain tant il presidi da la partida sco era quel da la fracziun vegnir manads enfin il favrer 2024 sco co-presidi. Ina tala furma paritetica duai era valair per auters posts, sco ils vice-presidis u la suprastanza da fracziun.

■ POLIZIA CHANTUNALA



FOTO POLIZIA CHANTUNALA

Um spari dapi in'emna, polizia dumonda per agid

(rtr/fmr) A Roveredo è spari Aleksander Olbrys. Il giuven da 20 onns han ins vesi la davosa giada ils 25 d'avrigl en ses domicil. L'um tschertgà è 1,80 meters grond, ha chavels cler brins, mez lungs e porta eglieirs quaders. El è da statura schlanca. Sco ultim ha el purtà in pullover, chauschas stgiras e chalzers nairs. Aleksander Olbrys discurra talian, tudestg, englais e polac. Indizis èn da communitar a la polizia.

■ GP VAL

Fadri Barandun e Nina Zoller gudognan

(rtr/fmr) L'Engiadinais Fadri Barandun ha gudagnà ier la cursa da velo da Panaduz via Glion fin a Val. Tar las dunnas è Nina Zoller da Cuira stada la pli sperta. Il temp è quest onn però vegnì mesirà sin quatter segments, mingamai las passaschas ensi. Sin ils tschancuns a val sco per exempel da Versomi a Glion, è il temp vegnì neutralisà.

Pervia da corona hai dà ina partenza singula – vul dir che minga minuta è ina ciclista u in ciclist vegnì tramess sin viadi. Tut en tut èn stads a la partenza 56 ciclistas e ciclists.

Avant dus onns aveva la cursa stuì vegnir annullada pervia da la naiv, avant in onn pervia da la pandemia da corona.

Il milan cotschen daventa in Grischun

Durant l'onn 2020 passa 1 200 observaziuns

BARTOLOME TSCHARNER/FMR

■ D'in bun decenni ennà vegn observà, ch'il milan cotschen sa derasa puspè plaun a plaun en il Grischun. Quest svilup vegn documentà dapi dus onns da duas ornitologas. Per incumbensa da la Gruppa ornitologica dal Grischun (OAG) observan Murièle Jonglez da Riein ed Alexandra Raguth Tschärner-Küchler da Veulden il svilup dal milan cotschen (Milvus milvus) ch'era da vesair enfin ils 2008 be da passadi en la Vallada dal Rain. Ma lezza stad è vegnì observà l'emprim cuadi en il Grischun. Dapi lura para il milan cotschen da daventar in utschè indigen. Per perseguitar ses svilup pli exactamain documenteschan las duas ornitologas sia derasaziun. «Nossa incumbensa è d'observar ils moviments dals milans cotschens en il Grischun cun agid da gidanters voluntaris, da'ls dumbrar e d'eruir lur spazi vital per emprender d'enconuscher meglier lur moda da viver e lur basegns», din las duas ornitologas che han publictà ultimamain lur rapport davart las observaziuns da l'onn passà.

Passa 1200 annunzias

«L'onn 2020 è stà per nus in onn captivant», scrivan ellas, «nus avain retschet 1219 annunzias per mail, telefons ed sms d'observaziuns da milans cotschens.»


La raschun per tantas annunzias vesan ellas en il fatg, ch'il milan cotschen sa derasa pli e pli, ma surtut che la gliעד al renconuscha meglier, essend infurmada pli bain davart sia cumparsa, ed alura èsi actualmain dapli gliעד che sa mova en la natira causa da la pandemia.

Sco auters onns èsi la gronda part da las observaziuns ch'èn vegnidas fatgas en Surselva, la Vallada dal Rain da Cuira, la Tumleasta e Mantogna, en Partenz ed a Tavau. Allegraivel saja er, ch'ellas hajan retschet dapli annunzias da l'Engiadina che anc l'onn avant. «Surtut avain nus retschet annunzias d'observaziuns novas



Il milan cotschen è tgunsch da renconuscher surtut durant il sgol: Tipic per el è sia cun furtgada e parts pli cler as da maun sut da las alas. Il plimadi è brin-cotschen ed il chau è pulit cler.

FOTO AUREL TSCHARNER



La derasaziun dal milan cotschen tenor las observaziuns dals 2020 e registradas da Murièle Jonglez ed Alexandra Raguth Tschärner-Küchler.

CARTA OAG

en l'Engiadina Bassa, la Val Müstair ed en la regiun dal cunfin da Danuder», scrivan Jonglez e Raguth Tschärner. La charta da la derasaziun conferma plinavant il muster cler, sco gia observà ils 2019, ch'il milan cotschen suonda a las auas, quai vala

surtut per la Vallada dal Rain anteriur ed en Partenz.

Il dumber da cuaditschs s'augmenta

Durant l'onn passà èn er vegnids observads otg pèrs che han cuà ed en nov ul-

terius lieux supponan ins cuadas. Dals otg cuaditschs cumprovads èn resortids indesch milans giuven. Ma i na saja betga stà d'eruir, quants da quels che hajan survivi. I saja dentant era da quintar cun in dumber nunenconuscent da cuaditschs betg observads. «Però ins po partir da quai, che la cumpart dals cuaditschs è creschenta», concludan las duas ornitologas.

La gronda part da las observaziuns dal milan pertugan ses sgols a la tschertga da vivonda u sgols tras intsches essend da passadi. Danovamain èsi vegnì observà milans anc l'atun tardiv. Ma er durant l'enviern passà han ins observà, ch'intgins milans passentan perfin la stagiun freida en il Grischun.

Il medem milan u in auter?

Ina gronda difficultad chaschuna a las duas ornitologas da differenziar, sch'i sa tractia dal medem milan, cur ch'i vegnan fatgas pliras annunzias d'ina regiun. «Ma grazia a las observaziuns pli frequentas e pli exactas avain nus pudì eruir meglier, sch'i sa tractia dal medem utschè», scrivan ellas, perquai saja fitg impurtant, ch'ils observaturs inditgeschian exactamain il lieu ed il temps da lur observaziun. «Ma i vala vinavant, mintga observaziun è da gronda impurtanza ed igl è impurtant ch'ella vegnia annunziata a nus», punctueschan ellas, engraziand a tuttas persunas che gidan d'observar il milan cotschen en il Grischun. «Per pudair documentar vinavant il svilup dal milan cotschen essan nus dependents da tantas observaziuns sco pussaivel, durant tuttas stagiuns», appelleschan ellas a la populaziun dal Grischun.

Observaziuns dal milan cotschen pon vegnir annunzias, inditgond data, temp, lieu exact, dumber d'utschels e lur cumpurtament, a las suandantas adressas: m.a.rotmilan.gr@gmail.com, Alexandra Raguth Tschärner-Küchler, 076 499 70 86 ubain Murièle Jonglez de Ligne, 078 683 01 30.

Rodas che roclan e rollan

Dacurt è cumparì il primalbum da las «Rodas», il trio actual da Corin Curschellas

BENEDETTO VIGNE

■ Ins pudess bunamain dir che cun las «Rodas» haja Corin Curschellas chattà sia gruppa optimala, in trio reduci a l'accordeon da Patricia Draeger, al cello da Barbara Gisler ed a sia atgna vusch nunconfundibla – magari er la combo minimala adattada per quests dis pandemics. Ina furmaziun che sugerescha intimitad e calma, che projectescha la structura d'ina fina manidla kammermusik. Ma uschè finas n'èn las «Rodas» betg! L'accordeon tira endament la musica populara alpina, ma igl è evident che la gruppa na vul betg vegnir messa en truclets stilistics, e perquai cumenza ses emprim album, cumparì questa primavaira, gist cun ina skizza che oscillescha vagamain tranter jazz e tango. Igl è in fresco musical cun il titel «Zuckerbäcker»: Corin Curschellas propona qua in protestsong helvetic, confruntand regords ad in agen passà precar alpin cun la miseria ch'ans cuntanscha ozendi d'ordaifer, sin bartgas naufragiantas, ma er cun il sfarlatim actual da nossas ritgezass natirals. Igl è in pamflet detg prosaic – Corin n'è betg la gronda poetessa, ma en la epoca «rappunza» dastg'ins senz' auter er esser placativa.

Da la staziun da Turitg tar ils Gualsers I dat en l'album anc ulteriurs chanzuns dialectalas tudestgas, duas scrittas da la



Il trio «Rodas» cun (da san.) Barbara Gisler (violoncello), Corin Curschellas (chant) e Patricia Draeger (accordeon).

FOTO MAD

chantautura gia avant onns per vusch collegas e reprimidas uss en tonalitat «rodaica»: In purtret detg melanconic da la staziun principala da Turitg ed ina sgarschurusa ballada da strias cun trantertuns da Brecht e Weill. La vart tudestga vegn cumpletada d'ina spezia dad «alpsegen» onomatopieic e d'ina veglia chanzun gualsra che citescha las famusas lingias popularas svizras da «muschkchaatä» e «nägli». Poliglotta sco adina preschenta Corin Curschellas er ina melodia detg flurusa ch'ella ha cumponi sin in text dal poet englais William Wordsworth, datond dal 1800.

Da sautunzas, filunzas e lavunzas

Ma igl è surtut ils chants rumantschs ch'ans interessan qua. E tge surpraisa frecha ans porscha il primalbum da las «Rodas»: Corin, la chantadura cun background sursilvan e dimora actuala a Ru-eun preschenta in tut nov chanzuns exclusivamain engiadinais! Ina casualità. Tranter quellas il chant da balenas «Al mar», tenor ina poesia da Clo Duri Bezzola barmier, la represa d'ina da las pli bellas melodias da Corin Curschellas, cumparida oriund sin l'album «Valdun» dal 1997. E lura spiras autras chanzuns popularas ladinas, veglias e novas, da sautunzas, filun-

zas, lavunzas. Concret: «Donna, donna vè a cha», «Saira per saira», «Laschiva gronda sül bügl». Ed uschè vinavant.

In ensemble che rocla e rolla

Grondius co las «Rodas» vegnan da dar a mintga toc in'atgna temprà, in'atgna colur: quai tuna ina giada sco imni d'encreschadetgna, ina giada sco bella tarantella, ina giada vegn la melodia circumdata da musique concretè, ina giada ornada da ghirlandas creolas. E quella varietad gartegia a la gruppa grazia al chant chaud e baintemperà da Corin, al violoncello tentalus da la Turgoviana Barbara Gisler, cumprovà tant en musica classica sco en quella populara. Ma surtut al talent arranschader da la Zugaisa Patricia Draeger, in'instrumentalista universal ch'ha studigià classica moderna e jazz, ch'ha gia sunà ses accordeon per tut il mund enturn e che vala sco ina da las pli valurusas musicistas svizras da quests dis. Las «Rodas» – in ensemble che rocla e rolla bain!



L'album «Rodas» è cumparì ils 16 d'avrigl ed è venal en las stizuns da musica.